

Panalangin ng mga Kristiyano sa Maghapon
LITURGY OF THE HOURS

PANALANGIN SA UMAGA

Ika-26 ng Abril, 2025

{ Saturday within the Octave of Easter }



Paanyaya sa Panalangin

Tumayo at gawin ang tanda ng krus sa mga labi

Panginoon, buksan mo ang aking mga labi.

— At pupurihin ka ng aking bibig.

Salmo 95

Ang Panawagan upang papurihan ang Diyos

Ang Panginoon ay muling nabuhay, aleluya.

— Ang Panginoon ay muling nabuhay, aleluya.

Tayo ay lumapit sa ‘ting Panginoon, Siya aawitan,
Ating paputihan ang batong kublihan nati’t kalakasan.
Tayo ay lumapit sa kanyang harapan na may pasalamat,
Siya ay Purihin ng mga awiting may tuwa at galak.

— Ang Panginoon ay muling nabuhay, aleluya.

Sapagkat ang Diyos ay ang Panginoong napakadakila,
Ang dakilang Haring higit sa sinuman na binabathala.
Nasa kanyang palad ang buong daigdig pati kalaliman,
Ang lahat ay kanya maging ang mataas nating kabundukan.
Kanya rin ang dagat at pati ang lupa na kanyang nilalang.

— Ang Panginoon ay muling nabuhay, aleluya.

Tayo ay lumapit, sa kanya’y sumamba at magbigay-galang,
Lumuhod sa harap nitong Panginoong sa ati’y lumalang.
Siya ang ating Diyos, tayo ay kalinga niyang mga hirang,
Mga tupa tayong inaalagaan.

— Ang Panginoon ay muling nabuhay, aleluya.

Ang kanyang salita ay ating pakinggan:
“Iyang inyong puso’y huwag patigasín,
Tulad ng ginawa ng inyong mga magulang
Nang nasa Meriba, sa ilang ng Masa.
Ako ay tinukso’t doon ay sinubok ng inyong magulang,
Bagamat nakita ang aking ginawang sila’ng nakinabang.

— Ang Panginoon ay muling nabuhay, aleluya.

Apatnapung taon, sa inyong ninuno ako ay nagdamdam,
Ang aking sinabi, “Sila ay suwail, walang pakundangan
At ang mga utos ko ay sinusuway!”
Dahil sa galit ko, ako ay sumumpang di sila daratal,
Sa lupang pangakong aking inilaan.”

— Ang Panginoon ay muling nabuhay, aleluya.

Papuri sa Ama, at sa Anak, at sa Espiritu Santo;
Kapara noong una, ngayon at magpasawalang hanggan. Amen.

— Ang Panginoon ay muling nabuhay, aleluya.

Panalangin sa Umaga

AWIT

Si Hesus ngayo’y muling nabuhay, aleluya!
Magalak tayo sa ’ting tagumpay, aleluya!
Ipinako s’ya, sa krus namatay, aleluya!
Upang iligtas tayong nawalay, aleluya!

Sambahin natin at papurihan, aleluya!
Ang Kristong Hari’y ating itanghal, aleluya!
Tao’y tinubos sa kasalanan, aleluya!
Ang mga angel ay mag-awitan, aleluya!

Sa ’ting D’yos Ama ang kapurihan, aleluya!
At sa D’yos Anak, na Haring Mahal, aleluya!
At Espiritung, Diyos na Banal, aleluya!
Darakilain magpakailan man, aleluya!

Umupo o tumayo

MGA ANTIPONA AT SALMO

Antipona 1

Ang kabunyian ni Kristong muling nabuhay ay nagniningning sa
mga taong tinubos ng kanyang dugong mahal, aleluya.

Salmo 63:2-9

(Ang kaluluwang ubaw sa Diyos)

O Diyos, ikaw ang aking Diyos na lagi kong hinahanap,

Ang uhaw kong kaluluwa'y tanging ikaw yaong hangad;
Para akong tuyong lupa na tubig ang siyang lunas.
Bayaan mong sa santwaryo, sa lugar na dakong banal,
Ikaw roo'y mamasdan ko, sa likas mong karangalan.

Ang wagas na pag-ibig mo'y mahigit pa kaysa buhay,
Kaya ako'y magpupuri't ikaw ang pag-uukulan.
Habang ako'y nabubuhay, ako'y magpapasalamat,
At ako ay dadalangin na kamay ko'y nakataas.
Itong aking kaluluwa'y kakaing may kasiyahan,
Magagalak na umawit ng papuring iaalay.

Laman ka ng gunita ko samantalang nahihimlay,
Magdamag na ang palaging iniisip ko ay ikaw;
Pagkat ikaw sa tuwina ang katulong na malapit,
Sa lilim ng iyong pakpak galak akong umaawit.
Itong aking kaluluwa'y sa iyo lang nanghahawak,
Pagkat ako kung hawak mo, kaligtasa'y natitiyak.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Ang kabunyian ni Kristong muling nabuhay ay nagniningning sa
mga taong tinubos ng kanyang dugong mahal, aleluya.

Antipona 2

Bumangon mula sa libingan ang ating Manunubos; halina't
papurihan ang Panginoon nating Diyos, aleluya.

Awit: Daniel 3:57-88, 56

(Purihin nawa ang Diyos ng lahat ng nilalang)

Purihin ninyo ang PANGINOON, kayong lahat na mga nilikha,
Awitan siya ng papuri at dakilain magpakailanman.
Purihin ninyo ang PANGINOON, kayong lahat, mga kalangitan;
Awitan siya ng papuri at dakilain magpakailanman.
Purihin ninyo ang PANGINOON, kayong lahat, mga anghel ng
PANGINOON,
Awitan siya ng papuri at dakilain magpakailanman.
Purihin ninyo ang PANGINOON, kayong lahat, mga tubig sa

ibabaw ng langit;
 Awitan siya ng papuri at dakilain magpakailanman.
 Purihin ninyo ang PANGINOON, kayong lahat na bumubuo ng
 kanyang hukbo;
 Awitan siya ng papuri at dakilain magpakailanman.
 Purihin ninyo ang PANGINOON, araw at buwan;
 Awitan siya ng papuri at dakilain magpakailanman.
 Purihin ninyo ang PANGINOON, mga bituin sa langit;
 Awitan siya ng papuri at dakilain magpakailanman.
 Purihin ninyo ang PANGINOON, mga ulan at hamog;
 Awitan siya ng papuri at dakilain magpakailanman.
 Purihin ninyo ang PANGINOON, lahat ng hanging umiihip sa
 sandaigdigan;
 Awitan siya ng papuri at dakilain magpakailanman.
 Purihin ninyo ang PANGINOON, apoy at init;
 Awitan siya ng papuri at dakilain magpakailanman.
 Purihin ninyo ang PANGINOON, nakapapasong init at
 matinding lamig;
 Awitan siya ng papuri at dakilain magpakailanman.
 Purihin ninyo ang PANGINOON, mga hamog at niyebeng
 nalalaglag;
 Awitan siya ng papuri at dakilain magpakailanman.
 Purihin ninyo ang PANGINOON, mga araw at mga gabi;
 Awitan siya ng papuri at dakilain magpakailanman.
 Purihin ninyo ang PANGINOON, liwanag at kadiliman;
 Awitan siya ng papuri at dakilain magpakailanman.
 Purihin ninyo ang PANGINOON, graniso at ginaw;
 Awitan siya ng papuri at dakilain magpakailanman.
 Purihin ninyo ang PANGINOON, yelo at niyebe;
 Awitan siya ng papuri at dakilain magpakailanman.
 Purihin ninyo ang PANGINOON, mga kidlat at mga ulap;
 Awitan siya ng papuri at dakilain magpakailanman.
 O lupa, dakilain ang PANGINOON;
 Awitan siya ng papuri at dakilain magpakailanman.
 Purihin ninyo ang PANGINOON, mga bundok at mga burol;
 Awitan siya ng papuri at dakilain magpakailanman.
 Purihin ninyo ang PANGINOON, lahat ng tumutubo sa lupa;

Awitan siya ng papuri at dakilain magpakailanman.
 Purihin ninyo ang PANGINOON, mga dagat at mga ilog;
 Awitan siya ng papuri at dakilain magpakailanman.
 Purihin ninyo ang PANGINOON, mga bukal ng tubig;
 Awitan siya ng papuri at dakilain magpakailanman.
 Purihin ninyo ang PANGINOON, mga balyena at lahat ng
 nilikhang nasa tubig;
 Awitan siya ng papuri at dakilain magpakailanman.
 Purihin ninyo ang PANGINOON, lahat ng ibon sa himpapawid;
 Awitan siya ng papuri at dakilain magpakailanman.
 Purihin ninyo ang PANGINOON, mga kawan at mga mailap na
 hayop;
 Awitan siya ng papuri at dakilain magpakailanman.
 Lahat ng tao sa daigdig, purihin ninyo ang PANGINOON;
 Awitan siya ng papuri at dakilain magpakailanman.

 Purihin ninyo ang PANGINOON, bansang Israel;
 Awitan siya ng papuri at dakilain magpakailanman.
 Purihin ninyo ang PANGINOON, mga saserdote ng Diyos;
 Awitan siya ng papuri at dakilain magpakailanman.
 Purihin ninyo ang PANGINOON, mga lingkod ng
 PANGINOON;
 Awitan siya ng papuri at dakilain magpakailanman.
 Purihin ninyo ang PANGINOON, kayong lahat na mga tapat;
 Awitan siya ng papuri at dakilain magpakailanman.
 Purihin ninyo ang PANGINOON, lahat ng banal at mababang-
 Ioob;
 Awitan siya ng papuri at dakilain magpakailanman.
 Purihin ninyo ang PANGINOON, Ananias, Azarias at Misael;
 Awitan siya ng papuri at dakilain magpakailanman.

 Pagpalain ang Ama at Anak at Espiritu Santo;
 Awitan siya ng papuri at dakilain magpakailanman.
 Purihin ka sa buong sangkalangitan;
 Karapat-dapat kang awitan at dakilain magpakailanman.

Antipona

Bumangon mula sa libingan ang ating Manunubos; halina't
 papurihan ang Panginoon nating Diyos, aleluya.

Antipona 3

Aleluya, ang Panginoon ay muling nabuhay ayon sa kanyang pangako, aleluya.

Salmo 149

(Ang galak ng banal na bayan ng Diyos)

Purihin ang PANGINOON!

O ang PANGINOON ay purihin, awitan ng bagong awit,

Purihin sa pagtitipon ng tapat sa pananalig.

Magalak ka, O Israel, dahilan sa Manlilikha;

Dahilan sa iyong hari, ikaw Sion ay matuwa.

Purihin sa pagsasayaw, purihin ang kanyang ngalan;

Alpa't tambol ay tugtugin, at siya ay papurihan.

Ang PANGINOON ay nagagalak sa kanyang mga hirang,

Sa nangagpapakumbaba'y tagumpay ang ibibigay.

Sa tagumpay na natamo, magalak ang mga hirang,

Sa kanilang pagpipista ay magsaya't mag-awitan.

Sa pagpuri sa PANGINOON, ay bayaang magsigawan

Na taglay ang matatalim na sundang sa mga kamay,

Upang yaong mga bansang nagmalabis ay gantihan,

At bigyan ang mamamayan ng parusang kailangan.

Sa ganito, ang kanilang mga hari'y papangawan,

At ang mga pangunahin ay kadenang yaring bakal.

Sang-ayon sa utos ng Diyos, mga bansa'y magdurusa;

Ang tatanggap ng tagumpay, ay ang mga hirang niya.

Papuri sa Ama, at sa Anak, at sa Espiritu Santo,

Kapara noong una, ngayon at magpasawalang hanggan. Amen.

Antipona

Aleluya, ang Panginoon ay muling nabuhay ayon sa kanyang pangako, aleluya.

PAGBASA NG SALITA NG DIYOS

Gawa 10:40-43

Muli siyang binuhay ng Diyos sa ikatlong araw. Napakita siya, hindi sa lahat ng tao kundi sa amin lamang na noon pang una'y pinili na ng Diyos bilang mga saksi. Kami ang nakasama niyang kumain at uminom pagkatapos na siya'y muling mabuhay. Inatasan niya kaming mangaral sa mga tao at magpatotoo na siya ang itinalaga ng Diyos na maging Hukom na mga buhay at mga patay. Siya ang tinutukoy ng mga propeta nang kanilang ipahayag na bawat mananalig sa kanya ay tatanggap ng kapatawaran sa kanilang mga kasalanan, sa pamamagitan ng kanyang pangalan.

Antipona

Ito ang araw na ginawa ng Diyos; magalak tayo at matuwa nang lubos, aleluya.

Tumayo

PAPURING AWIT NI ZACARIAS

Antipona

Nang Linggo ng umaga, pagsikat ng araw, sila'y nagpunta sa libingan, aleluya.

Lukas 1:68-79

Gumawa tanda ng krus

Purihin ang Panginoong Diyos ng Israel!
Sapagka't nilingap niya at pinalaya ang kanyang bayan.

At nagpadala siya sa atin ng isang makapangyarihang
Tagapagligtas,
Mula sa lipi ni David na kanyang lingkod.

Ipinangako niya sa pamamagitan ng kanyang banal na propeta
noong una,
Na ililigtas niya tayo sa ating mga kaaway,
At sa kamay ng lahat ng napopoot sa atin.

Ipinangako rin niya na kahahabagan ang ating mga magulang,

At aalalahanin ang kanyang banal na tipan.

Iyan ang sumpang binitiwang niya sa ating amang si Abraham,
Na ililigtas tayo sa ating mga kaaway,
Upang walang takot na makasamba sa kanya,
At maging banal at matuwid sa kanyang paningin, habang tayo'y
nabubuhay.

Ikaw naman, anak, ay tatawaging propeta ng Kataas-taasan;
Sapagka't mauuna ka sa Panginoon upang ihanda ang kanyang mga
daraanang,
At ituro sa kanyang bayanang landas ng kaligtasan,
Ang kapatawaran ng kanilang mga kasalanan.

Sapagka't lubhang mahabagin ang ating Diyos;
Magbubukang-liwayway sa atin ang araw ng kaligtasan.
Upang magbigay-liwanag sa mga nasa kadiliman at nasa ilalim ng
kamatayan,
At patnubayan tayo tungo sa daan ng kapayapaan.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Nang Linggo ng umaga, pagsikat ng araw, sila'y nagpunta sa
libingan, aleluya.

PANGKALAHATANG PANALANGIN

Kristong Panginoon ng Buhay na muling binuhay ng Ama;
siya ang muling bubuhay sa atin sa pamamagitan ng kanyang
kapangyarihan. Ating ipanalangin:

— Kristong aming buhay, iligtas mo kami.

Panginoong Hesus, liwanag na nagniningning sa kadiliman, inakay
mo sa buhay ang iyong sambayanan, at pinagkalooban ng biyaya ng
kabanalan ang aming marupok na kalikasan,
mairaos nawa namin ang araw na ito bilang papuri sa iyong
kadakilaan.

— Kristong aming buhay, iligtas mo kami.

Panginoon, tinahak mo ang landas ng pagpapakasakit at

pagkamatay,
makihati nawa kami sa iyong paghihirap at kamatayan, at muling
mabuhay upang makibahagi sa iyong kaluwalhatian.

— Kristong aming buhay, iligtas mo kami.

Anak ng Ama, aming Panginoon at kapatid, hinirang mo kami
bilang kalipunan ng mga pari para sa Diyos,
ang aming masayang alay ng papuri sa iyo nawa'y aming
maihandog.

— Kristong aming buhay, iligtas mo kami.

Hari ng kaluwalhatian, hinihintay namin ang dakilang araw ng
iyong mabunying pagdating,
mamasdan nawa namin ang iyong mukha nang harapan, at
magbagong-anyo ayon sa iyong wangis.

— Kristong aming buhay, iligtas mo kami.

Ama Namin

Ama namin, sumasalangit Ka
Sambahin ang ngalan Mo
Mapasaamin ang kaharian Mo
Sundin ang loob Mo
Dito sa lupa, para nang sa langit.
Bigyan Mo kami ngayon ng aming kakanin sa araw araw.
At patawarin Mo kami sa aming mga sala,
Para nang pagpapatawad namin
Sa mga nagkakasala sa amin.
At huwag Mo kaming ipahintulot sa tukso,
At iadya Mo kami sa lahat ng masama.
Sapagkat Iyo ang kaharian, at kapangyarihan,
At ang kadakilaan, magpakailanman.

PANGWAKAS NA PANALANGIN

Amang makapangyarihan,
sa pamamagitan ng pagkabuhay ni Kristong iyong Anak
nabuwag ang kapangyarihan ng kamatayan
at binuksan para sa amin ang landas
sa buhay na walang hanggan.

Ang pagdiriwang namin ngayong ginaganap
ay magpanibago nawa sa pamumuhay naming lahat
sa tulong ng Espiritung sa ami'y nagliliwanag,
sa pamamagitan ni Hesukristo,
kasama ng Espiritu Santo magpasawalang hanggan.

— Amen.

Paghayo

Pagpalain nawa tayo ng panginoon, iligtas tayo mula sa lahat ng
kasamaan at akayin tayo sa buhay na walang hanggan.

— Amen.

PANALANGIN NG MGA KRISTIYANO SA MAGHAPON

Ang mga tekstong biblikal at mga Papuring Awit na ginamit ay halaw mula sa MAGANDANG BALITA BIBLIA. Karapatang-sipi @ 1973, Philippine Bible Society, U.N. Ave., Manila.

Ang mga titik ng mga Awit at ang mga disenyong pansining ay likha ni Padre Mar DJ Arenas.

Karapatang-sipi @ 1994, LUPON REHIYONAL UKOL SA TAGALOG SA LITURHIYA.

Archdiocesan Liturgical Commission, Manila



mobile prayers



UNITED STATES OF AMERICA
www.ebreviary.com